

弘

簡

錄

弘簡錄卷四十

明刑部員外郎仁和邵經邦弘齋學

皇清翰林院侍講學士四世孫遠平校閱

庶官 唐六之一 文吏

丘和 李大亮兄弟皇甫無逸 李襲志弟襲韋仁壽

陳君賓 張允濟 李桐客 薛大鼎子克賈敦頤弟敦

川仁會子歸 韋機孫岳曾孫景駿附 蔣儼 裴懷古

楊元琰子仲昌 楊瑒會祖林甫 解琬 陽嶠 宋慶禮

姜師度強循 尹思貞 李傑 鄭惟忠 許景先

潘好禮 倪若水 韋恆弟濟 李惠登 蕭定

崔耀 孫成 羅珣子讓 薛珏子存 裴向

韋丹高祖琨 崔戎子雍 馬摠 薛戎 閻濟美

薛萃

子廣

盧弘宣

何易于

丘和洛陽人徙家于郿父壽魏鎮東將軍和少重氣俠閑弓馬
長乃折節自負與物無忤凡貴賤皆愛之仕周至開府儀同三
司入隋爲右武衛將軍封平城郡公歷資梁蒲三州刺史以寬
惠著名坐漢王諒反潛師入蒲廢免附宇文述復拜代州刺史
善撫吏士咸得其心煬帝北巡悅其饋獻精膳擢博陵太守由
是所過競爲珍獻復遷天水郡入爲左禦衛將軍大業末裴矩
薦爲交趾太守撫接羸境遠近安之時寧長眞舉鬱林附蕭詧
馮盎舉珠崖番禺附林士弘各遣使招和皆不從詧利其珍寶
命長眞率百越之衆渡海侵和遣長史高士廉率交愛首領
擊走之郡爲樹石勒功會隋驍果自江都來審知隋亡陳歛歸
國時嶺嶠閉汨權附于詧詧始得歸詔使李道裕授以交州

大總管薛謹國公俄遣士廉奉表請入朝詔其子師利往迎及
謁見高祖爲典引入臥內語平生歡甚宴享之日奏九部樂除
左武侯大將軍和時已老以覆州故鄉除特進令爲刺史以自
養卒年八十六贈荊州總管諡曰襄陪葬獻陵

李大亮隴西著姓徙雍州涇陽會祖瑛後魏度支尚書祖綱南
岐州刺史父充節隋朔州總管封武陽公大亮少有文武才略
隋末署龐玉行軍兵曹與李密戰敗被禽賊將張弼吳之弼得
釋義師入關遂自拔歸授土門令方歲饑多盜爲招亡散撫貧
瘠勸墾田歲以大稔間出擊盜所至輒平秦王巡北境下書獎
勞賜馬與帛賔之北寇大至度不能拒單騎詣營論曉酋帥爲
分別禍福相率感服來降擢金州總管府司馬王弘烈據襄陽
詔安撫樊鄧因經略下十餘城遷安州刺史復徇廣州至九江

遇輔公祏反以計禽其將張善安公祏方圍歙州刺史左難當
固守大亮率兵擊走之遷越州都督貞觀初徙交州封武陽縣
男名授太府卿復都督涼州有惠政詔使索名鷹表言陛下久
絕畋獵今使者至此果出陛下意乃乖昔旨如其擅求盍加以
罪帝報書宜守此誠始終如一賜以荷悅漢紀言其論議深博
極爲政之體宜加玩味大亮又上言欲綏遠必先篤近中國天
下本根四裔猶枝葉也頃突厥傾國來朝陛下加賜袍帶繒帛
悉拜以官引處內地豈久安計哉今伊吾雖臣遠在荒服臣以
爲諸稱藩請附者但羈縻之使居塞外謂之荒服臣而不內所
謂行虛惠收實福矧河西積州縣蕭條加以隋亂殘耗已甚
臣愚願停招慰省勞役使邊人得就農畝此中國利也帝納其
言八年爲劔南道巡省大使激揚清濁甚獲時譽會討吐谷渾

爲河東道行軍總管與李靖俱出北道涉青海觀河源遇敵於
蜀渾山大戰破之俘其名王獲雜畜數萬而還進爵爲公入拜
右衛大將軍工部尚書晉王昇儲兼太子右衛率更居三職宿
衛兩宮其見親信幸洛陽副房玄齡居守稱其可倚大事俄衰
疾帝親和藥驛賜之臨終表請罷遯東役願留意關中及京師
根本重地時年五十九帝慟哭贈兵部尚書秦州都督諡曰懿
陪葬昭陵爲人性忠謹外若不能言而內剛烈不可干以非義
對天子爭是非語無回撓事兄嫂以禮待妻子無惰容宗族有
不能葬并孤貧者爲瘞養之雖位通顯未嘗營第初破公麻賜
奴婢百口縱遣之後破吐谷渾復賜奴婢百五十口悉遣親戚
每思張弼脫死之恩圖有以報弼匿而不見一日議諸塗持之
涕泣悉推家財拒而不受奏授以巴官爵帝爲遷弼中郎將轉

代州都督。世皆賢。大亮能報。而多弼不自伐也。歿後。所有孤爲行服。如所親者。十餘人。兄子道裕。貞觀末爲將。作少匠。同百官議。張亮反。皆言亮當誅。獨道裕謂反形未具。帝怒。不暇省。斬之。後悔。遇宰相。推用刑部侍郎。帝猶思前言。遂以命之。後終大理卿。

皇甫無逸。字仁儉。安定著姓。徙京兆。萬年父誕。隋并州司馬。以不從漢王諒反。被殺。煬帝嘉其忠節。特贈柱國弘義郡公。封無逸。平輿侯。歷滑陽太守。以治最遷。右武衛將軍。帝幸江都。詔居守洛陽。旣被執。與段達。元文都立越王侗。王世充復篡。誓不同。逆棄母。與妻斬關白歸高祖。尊其勳。舊厚遇之。拜刑部尚書。封滑國公。歷陝東道行臺兼御史大夫。時益部漸定。更多橫恣。人不聊生。詔持節巡撫。得承制除吏。旣至。宣揚德化。法令嚴肅。黜

貪暴用廉善蜀人以安有儉人皇甫希仁嫉其專制方面上變
言爲母在長安陰交世充帝審其詐斬之遣給事中李公昌馳
往慰諭又言其交通蕭銑罪坐告者復與行臺寶璣不協上表
自理并劾璣罪詔劉世龍溫彥博往按無狀璣坐黜還日太宗
勞以當官執法無所迴避比多譴毀正坐此爾無逸頓首謝卽
拜民部尚書俄除同州刺史徙益州長史益勵清慎所至閉閣
不通賓客凡有所須輒市他境每上表疏過於畏蕙前之數四
猶懼未審素性孝謹聞母病甚憂悸得疾亟馳驛召還遂卒于
道贈禮部尚書諡曰良孫忠開元中爲衛尉卿

李襲志字重光本隴西狄道人五世祖景避地金州安康祖遷
哲周信州總管封安康郡公父敬猷襲封爲隋台州刺史襲志
初任始安郡丞隋末盜起傾私產募士三千乘城拒盜蕭銑林

士弘屢攻之不下開陽帝喪與士民縞素三日或說以據嶺表
取百粵不從固守始安凡二年力窮援絕爲銑所陷僞署工部
尚書桂州總管武德初高祖命其子玄嗣賫書往招密約嶺南
酋隨永平郡守李光度奉表歸國帝復書諭以宗黨不同異姓
宜及子弟並預屬籍旣而銑平江南道大使孝恭承制授桂州
總管五年來朝進桂國封始安郡公久之拜江州都督討輔公
祏爲水軍總管轉桂州都督在職二十八年政尚清省南荒便
之表請入朝加光祿大夫復授汾州刺史致仕卒子懷儼以文
才著名歷蘭臺禮部侍郎弟葵譽字茂實少通敏有識度隋
末爲冠軍府司兵值三輔盜起請於留守陰世師以兵據永豐
倉發粟賑窮乏出庫物賞戰士馳檄郡縣共逐捕賊世師不從
乃求出募山南兵至漢中高祖已定長安召授太府少卿封安

康郡公代王世充拜潞州總管委典選以儻東軍擢揚州長史
充江南巡察大使多所黜陟又引雷陂水築勾城塘溉田八百
頃以盡地利民多歸本名爲太府卿爲人性嚴怒所至以威肅
聞居家儉素祿廩隨散宗親以餘資寫書數致空乏嘗謂子孫
吾性不喜財然附京有賜田十頃河內有賜桑千樹事之可足
衣食所蓄書千卷力勤可求宦達爾曹勉之無資於人遷涼州
都督改同州刺史卒撰五經妙言四十卷江東記三十卷忠孝
圖二十卷行于世

袁仁壽萬年人隋末爲蜀郡司法斷獄平恕人受罪死亦無所
恨義旗起遣使者徇巴蜀承制擢爲州都督府長史治理有發
會南寧州納款以地荒遠每苦安撫使貪沓復叛去高祖聞仁
壽名詔權南寧都督寄治越嶲歲一按行慰勞將兵五百至西

洱河開地數千里置八州十七縣使酋豪爲牧宰威令清肅簡而不煩人人安悅將還酋長泣留曰天子藉公鎮撫奈何去我仁壽以池壁未立爲解諸酋仰相率築城起廨甫旬略具乃告以實曰吾奉詔第撫循庸敢擅留父老復悲啼祖行遣子弟隨貢方物上大悅乃請徙治其城假兵鎮守詔聽以便宜鄉重其事爲寶軌所阻托以中山獠反未遑遠略留歲餘病卒

陳君賓陳郡陽王伯山子仕隋爲襄國通守武德初羣郡聽命封東陽郡公遷邢州刺史貞觀初徙鄧州時承喪亂後百姓流徙乃加意勞徠不朞月皆還自業週四方霜潔獨所治境內有年倉儲充羨隣州蒲虞之民咸來就食邇相安養回遘之日各有贏糧乃別賞布帛以仲贈遺上方留意民事深懲隋末喪亂州里蕭條嘗曰與我共治者其惟良二千石乎因下詔褒美其

官爲支配得所並令考司錄爲功最卽名君賓入爲太府少卿
轉少府監坐事免起爲虔州刺史卒

張允濟青州北海人仕隋爲武陽令務以德教訓下百姓懷之
與元武接壤民間其名有犍牛依于婦家久將分異索所孳積
婦家不承詣允濟訴却曰若自有令吾何與焉民泣言令不能
決懇求其判語以無難令左右蒙民首假作告者給婦家云盜
其牛婦家爭曰吾豈盜牛者此牛乃婿家犍所生卽撤蒙民乃
服罪又道旁老姥亡所蒔葱教令還舍給言神降盡名男女至
其所言神怒輩盜者懼而掩口遂正其詞由是道不拾遺有行
人夜遺衣鞋行十餘里還而取之觀察使舉政尤異遷高陽郡
丞攝郡事下皆畏悅賊帥王須拔攻郡糧屈民食槐葉蒸餅終
無叛意貞觀初累遷刑部侍郎封武城縣男終幽州刺史

李桐客冀州衡水人仕隋爲門下錄事場帝名羣臣謀徙都丹陽左右希意皆謂江左望幸且久若巡吳會復禹舊跡甚善然桐客獨謂江南卑濕地且狹隘不足以奉萬乘給三軍今時人力又屈無以堪命且踰越險阻非社稷之福御史劾以謗毀僅而獲免俄爲字文化及所脇將至黎陽陷竇建德賊平授秦王府法曹參軍貞觀初累爲通巴二州刺史蒞政清平所至有名民呼慈父後卒於家

薛大鼎字重臣蒲州汾陰人祖善周太子少傅薛博平公父粹隋介州長史坐漢王諒黨被誅大鼎流辰州用戰功得還義師初興謁見龍門授大將軍府察非據出爲山南道副大使開屯田以實倉庫趙郡王孝恭討輔公祏引爲饒州道軍師將兵渡彭蠡湖破敵有功遷涪州刺史貞觀初徙涪州州擅魚鹽爲開

廢無根渠屬之海。商賈流行。里民歌曰。新溝起。舟楫利。屬滄海。漁鹽至。昔徒行。今騁駟。美哉薛公德。滂被州界甲。下又疏長蘆。漳衝三渠。分泄汙滌。水不爲害。與瀛州鄭德皆有治名。永徽中。遷銀青光祿大夫。行荊州大都督。長史辛諡曰。恭子克構。有器識。永隆初。歷戶部郎中。嘗沮族人紹尚。太平公主言室有傲婦。善士所惡。夫惟淑德。以配君子。無患可矣。紹卒。被誅。又論陳思忠有父喪。以辰日不見弔。客夫親在。避嫌尚可。旣孤矣。何嫌哭泣。世服其知言。弟克勤。歷司農少卿。

賈敦頤。曹州冤句人。先任滄州。在職廉潔。入朝。敝車羸馬。道上不知其刺史也。遷洛州司馬。以公累下獄。太宗特贖之。徙瀛州。州瀕滹沱河。每歲泛溢。壞室廬。寔如數百里。奏立隄堰。水不能暴。百姓利之。永徽中。遷洛州長史。舉沒豪右。占田踰制。盡賦貧

民凡三千餘頃。發姦擒伏，下無能欺。俄卒于官。時弟敦實爲饒陽令，治尚清靜。史民嘉美，咸亨初亦爲洛州長史。政寬惠，人心懷向。值洛陽令楊德幹酷烈殺人，立威諭止之曰：「政在養人，傷生過多，雖能不足，貴德幹聞之，更爲衰減。」入除太子右庶子。洛人多其治行，相高爲立石頌德，號棠棣碑。轉刺懷州，美蹟不滅。永淳初，致仕。卒年九十餘。子膺，福左散騎常侍，昭文館學士。德幹後歷澤、齊、汴、相四州刺史。子神讓，坐徐敬業伏誅。

田仁會，長安人。祖軌，隋幽州刺史。爵信都郡公。父弘，襲封。至陵州刺史。仁會武德中擢制舉，仕累左武侯中郎將。征遼東，與執失思力共敗遼將薛延陀，逐北數百里。璽書嘉獎，永徽中爲平州刺史，勸學務農，稱爲善政。轉郢州，屬歲旱，自暴以祈。大雨隨至。穀反倍登。百姓歌曰：「父母育我田，使君挺精誠。兮上天聞中。」

田致雨山出雲倉廩實兮禮義申願君常在不患貧五遷勝州
都督境有夙賊依山剽旅發騎捕格殲之城門夜開道無寇跡
入除太府少卿麟德二年遷右金吾將軍疊擊疾惡晝夜巡行
自宮城至衢路微姦必發劾徙女巫蔡氏於邊人無貴賤舉長
停之總章二年遷太常卿咸亨初轉右衛將軍年老乞骸卒年
七十八贈戶部尚書諡曰威子歸道明經及第累擢通事舍
人內供奉左衛郎將時突厥默啜背惠積年悔過入朝武后詔
攝司賓卿往勞因請六胡州及都護府地不得默啜怨望執留
將害之色不爲變且陳禍福突厥悔悟會有詔賜以粟段農器
且許結婚乃更以禮遣歸旣還具陳默啜不臣狀請備邊郅已
而果反擢爲夏官侍郎益親信遷左金吾將軍司膳卿封原國
公押千騎宿衛玄武門以不豫誅二張免還私第中宗拜太僕

少卿遷殿中少監復任金吾卒贈輔國大將軍諡曰烈子賓庭
開元時至光祿卿

韋機萬年人祖元禮隋沂州刺史父恪洛州別駕機貞觀中爲
左千牛曹充使往西突厥冊立同俄設爲可汗會石國反叛
路絕不得歸裂裳裹糝所經諸國風俗物產名西征記還獻太宗
大悅擢朝散大夫遷殿中監顯慶中爲檀州刺史邊州素無學
校敦勸生徒創立孔廟圖七十二子及自古賢達皆爲贊述郡
人大化會計高麗供儲不乏高宗以爲能超拜司農少卿兼知
東都管田甚見委遇有宦者犯法奏杖之賞以絹疋上元中遷
司農卿檢校園苑造上陽宮并移中橋徙立德坊於長夏門時
人稱其省功便事道士朱欽遂所爲橫恣機囚之武后不悅坐
免永淳中高宗幸東都白衣領職復拜少卿卒子餘慶官至右

驍衛兵曹孫岳亦以吏幹著名武后時累轉汝州司馬幸長安
名拜尚舍奉御從駕還京因召見賞慰良久尋忤旨左遷宋州
長史歷海靄二州刺史所在恩威並施著聲跡睿宗召爲殿中
少監甚承恩顧姜皎陷之復貶渠州別駕遷陝州刺史卒會
孫景駿中明經神龍中爲肥鄉令人苦漳水泛溢漕渠迫近雖
數修舊堤漂流相繼乃尋度地勢拓南數里因高障水循隄而
去悉以無患凡燥隄沮洳盡爲良田人稱神明舊有長橋年患
修葺改爲浮橋功省費約遂爲成規至今賴焉時河北饑躬撫
合境通其贍恤村閭貧弱咸免流亡去日民立碑頌德開元中
移貴鄉令有母子相訟景駿告以少孤見人養親輒自恨終天
汝幸有母在何至是錫類不行令之罪也因垂泣嗚呼仍取孝
經休令習讀於是母子感悟各請改悔遂稱慈孝累轉趙州長

史路由肥鄉人爭犒餞。爾連經日後遷房州刺史。州窮險有蠻
貊風無學校。好淫祀。既至始立貢舉。作興諸生。通監道。作傳舍。
罷祠祀。無名者治民。惟取其便。終奉天。令與清漳。令馮元淑臨
洛。令楊茂謙齊名。茂謙擢制舉。授左拾遺。內供奉。爲吏介。而
勤歷秘書郎。遷大理正。左臺御史中丞。開元初出爲魏州刺史。
河北道按察使。終桂廣二州都督。元淑再歷浚儀。始平二縣。
皆單騎赴任。未嘗以妻子之官。奴僕。每日一食。俸錢之餘。以給
貧士。中宗憚書勞。勉令史官編其事跡。終祠部郎中。

蔣儼常州義興人。擢明經。爲右屯衛兵曹參軍。太宗將伐高麗。
儼奮然請行。莫離支困之以兵。脅降不屈。內宿室中。平後。始得
歸。帝奇其節。授朝散大夫。爲幽州司馬。有善政。巡察使劉祥道
表其最狀。擢會州刺史。遷殿中少監。數陳時政利病。高宗優納。

進蒲州刺史戶產充夥犴獄堆積至卽發隱禁姦號良二千石
永隆二年以老致仕未幾起爲太子右衛副率嘗辨論裴炎心
非反逆中宗在東宮又數爭過失俱不納用時方尊禮處士田
游巖以爲太子洗馬屢論書貴之曰太子年方鼎盛聖道有所
未盡足下受命調護居有言責唯唯悠悠不出一談向使不養
王粟僕何敢譏今祿及親矣尚何酬塞游巖愧不能答儼尋權
太常卿文明中轉右衛大將軍封義興縣子以太子詹事致仕
卒年七十八贈禮部尚書有文集五卷

裴懷古壽春人姿素虺弱儀鳳中上書補下邳簿遷監察御史
諫爲姚崇道懷輯使申明誅賞叛者日歸遂縛首惡安定南方
蠻人立石著功叩闕願爲鎮守以疾辭免恒州浮屠爲其徒誣
告武后大怒卒爲中解會闕知微使馭毀命監其軍欲降之不

肯囚于軍中得間亡歸宛轉山谷僅達并州名入遷祠部員外郎轉司封郎中出爲桂州都督時始安賊歐陽倩衆數萬剽沒州縣命兼招慰討擊使未踰嶺先遣以書開諭禍福賊遂迎降自訴爲吏所侵懷古知其誠輕騎赴之至壁撫諭倩等大喜悉歸所掠出降諸洞率連根赴素翻覆者亦降嶺外平徙相州刺史并州長史所至吏民懷愛神龍中召爲左羽林大將軍并人攜扶老稚不忍捨詔復原任俄轉幽州都督終左威衛大將軍爲人清介審慎馭士信臨財廉爲國名將

楊元琰字溫哉州閩鄉人漢太尉震遠裔隋禮部尚書希曾孫生數歲未言相者以爲神定後必大發及長秀眉美髯崇肩博頤以器局見稱居父喪七日不食服除補梓州參軍遷平棘令課政第一受御史旌延載初璽書褒薦擢永寧軍副使遷安南

副都護歷新蒲晉魏宣許六州刺史涼梁荆三府長史前後清
白九度陞進咸有風績長安中張柬之代爲荊州泛江私語革
命及諸武擅權之狀元琰悲涕慷慨志在王室柬之執政引爲
右羽林將軍語以江上之言授任非細卽定計策功成進雲麾
將軍封弘農郡公實封戶五百賜鐵券覺三思構禍悉還官封
請祝髮事浮屠中宗不許敬暉以爲戲言答曰功成身退此意
由衷豈空言哉及暉等皆得罪元琰勸全再遷衛尉卿加金紫
光祿大夫願追崇其親贈越州都督復坐善李多祚繫獄蕭至
忠救免之睿宗立四遷刑部尚書改封魏國公開元初拜太子
賓客詔設位東宮令太子拜俄致仕卒年七十九諡曰忠生平
無資留蓄中外食其家常數十人子仲昌字蔓幼通經爲修
文生以河陽尉對策玄宗擢第一授蒲州法曹參軍判入異等

遷監察御史長于史事坐累為孝義令鸞降庭樹太守蕭恕表其政徙下邳終吏部郎中御身以約常分父邑租賑宗黨善與人交士庶樂從之游仲嗣密州刺史

曰曰功成身退今古格言哲哉元琰厥舉鸞

楊瑒字瑤光高祖繼陳中書舍人以辭學擅名終交愛九州都督封武康郡公陳亡由江左徙華陰曾祖林甫字衡卿為柳城太守至都督降隋高祖唐興擊郡來歸授總管拜絳州刺史封宜春郡公祖琮字孝璋為上津令與秦王同里居武德初拜府參軍兼庫直內難平太宗賜懷昔賦申以恩意終沔綏二州刺史瑒始為麟游令實懷真監營金仙玉真二觀檄畿內有隱逆人貴者斂以佐費瑒拒不受懷真怒其卑末輒敢如此對曰所論恐民冤抑不知計位高甲由是遂止初韋后表民二十二為

丁限及敗有司尚趣其課孰以庶人臨朝所革詔書非一獨不廢此乎亦止不課由是名顯擢累殿中侍御史開元中歷御史中丞戶部侍郎帝用宇文融言御延英殿召宰執讎天下戶版塲奏民間損益利病據理爭之帝雖吝賞出爲華州刺史封太山奏免樂工居喪者十六年入爲國子祭酒表滄州王迥質瀛州尹子路經學優長德行純茂堪爲後生師範有詔授迥質諫議大夫皇太子侍讀子路直弘文館皆有名又奏有司帖試明經不質大義惟取年頭月尾孤經絕句且今習春秋三傳并儀禮者十纔一二恐諸家遂廢請獎孤學存大典其能通者稍加優宦從之因詔三傳儀禮出身者不任散官著爲令生徒爲立頌太學門又言唐興二監學徒虛費官廩博士空糜厚祿舉者常千百選者十一二考功復限天下明經進士歲裁百人而流

外及諸色仕者歲過二千比明經進士何啻十倍夫以胥史浮
虛之徒耗先王禮義非與服勤道業者挈長較短今國家啓序
序廣化道將以有用而勸進之有司立限約反黜退之欲望俊
又在朝難矣帝然其言再遷大理卿以疾辭改左散騎常侍卒
年六十八贈戶部尚書諡曰貞居家能用古禮冠昏喪祭皆據
舊典爲之節文在官清白吏請立石紀德辭曰但事益於人書
名史氏足矣若碑頌者徒遺後人作石耳伯父志操頗剛簡
未遇時著閑居賦自託位終司屬卿封平安縣男從兄晏精孝
經常手寫數十篇可教者輒遺之

解琬魏州元城人少應幽素科中舉調浙政尉轉成都丞奏事
稱旨躡除監察御史以喪免聖曆初遷侍御史安撫烏質勒及
十姓部落咸得其宜以功擢御史中丞兼北庭都護西域安撫

使宗楚客惡之左授滄州刺史爲政務引大體部人願附景龍
中遷御史大夫兼朔方行軍總管前後乘邊積二十年務農習
戰多爲長利內外安之景雲二年復爲朔方大總管分遣隨軍
要籍官河陽丞張冠宗普安令于處忠等料三城兵省其戍十
萬改右武衛大將軍檢校晉州刺史賜爵濟南縣男乞骸加金
紫光祿大夫聖書勞問準品給以全祿會吐蕃擾邊復授左散
騎常侍詔與蕃定經界因詣輯十姓降戶建言不可以信約請
調兵十萬屯秦渭間防遏其姦是冬吐蕃果入爲秦渭兵擊走
之俄復請老不許遷太子賓客開元五年轉同州刺史年八十
餘卒

陽嶠北齊右僕射休之玄孫其先北平人徙洛陽儀鳳中應八
科舉調將陵尉累遷詹事司直長安中桓彥範袁恕已交薦擢

監察御史不樂搏擊以情白內史楊再思轉達其言彥範曰爲
官擇人豈徇所樂惟不情願尤須任之以長難進之風抑殊進
之路陞右臺侍御史尋轉國子司業資性恭謹篤於好學素有
儒者之風喜誘勸後生時人以爲善職奏修聖廟及講堂建碑
前庭以紀崇儒之事睿宗立拜尚書右丞出爲魏州刺史歷荆
州長史本道按察使所在以清白聞魏人詣闕勞耳請再臨其
郡復命治之尋遷國子祭酒封北平縣伯薦名儒尹知章范行
恭趙玄默爲學官時學徒漸弛乃課率經業稍行鞭撻爲人素
友弟撫孤姪與子均雖位方伯其心不改昔時一尉終老致仕
卒諡曰敬

宋慶禮洺州永平人擢明經補衛縣尉雅有方略武后詔桓彥
範行河北議斷居庸岳嶺五回等路以備突厥特召慶禮謀其

事深器重之俄遷大理評事充嶺南採訪使會崖振五州首領
更相侵掠荒俗不安前使輒以瘴癘為辭莫敢往慶禮躬遣其
境詢問風俗論以利害禍福首領皆釋管相親由是安堵罷鎮
兵五千人歷監察殿中侍御史以習識邊事拜河東北度支營
田使稍遷貝州刺史初營州督府治柳城扼制奚契丹以前趙
文顯廢更治東漁陽城開元中奚契丹款附帝欲復治故城
宋璟固爭不可慶禮獨陳其利詔與營事妻師度曉斷將軍節
宏統率士卒興役三旬而畢卽以兼營州都督檢校御史中丞
開屯田八十餘所追復漁陽瀋青沒戶還舊田宅招集商胡建
立邸肆不數年倉廩充實居民蕃庶遂罷海運卒贈工部尚書
在邊三十年為政嚴明少私下吏畏威常不敢犯善騎射能日
馳數百里耐於勞苦然好興作濱塞掘堦植兵議者嗤其不切

於事太常博士張星議諡以專禮部張九齡申駁改諡曰敬。
姜師度魏人擢明經調丹陵尉龍圖令有清白稱神龍初遷易
州刺史兼御史中丞河北道巡察度支營田使勤於政理綽有
巧思頗知疆域之利始廝溝於薊門以限奚契丹復循魏武故
迹並海鑿渠以通餉路可避海運之險且費省功多當時賴之
進銀青階累遷大理司農二卿開元初為陝州刺史故時太原
倉水陸所輳運者轉屬諸河然後登舟勞費不貲及是依高為
厝而注米於舟鑿地道自上注之便至水次所省萬計人不告
勞加太子詹事徙管州治柳城拜營田使度修築使使繕葺府
寺進為河中尹安邑鹽池久涸仍大發卒開拓疏決水道置為
鹽屯公私收利不貲徙同州刺史就古通靈陂派洛水灌朝邑
河西二縣開河收棄地二千頃為上川五十餘屯收穫萬計帝

幸長春宮嘉其功下詔褒美進金紫光祿大夫賜帛三百匹選
將作大匠卒年七十餘生平好典作所至鑿漕渠徭役紛紜不
能皆便然所就必爲後世利與強循皆以吏幹知名 循字季
先鳳州人仕累雍州司士參軍華原無泉人畜多暍死循教人
築水浸田一方利之號強公渠詔書褒美歷大理少卿太子右
庶子至戶部侍郎爲政辦給不爲威嚴遇人盡信不疑然當時
恨其少文

尹思貞長安人明經擢第調隆州參軍按晉安豪族蒲氏鶩
肆不法撻其姦賊論死部人稱頌刻碑以紀其事聲名遠播遷
明堂令以善政聞三遷殿中少監出爲洛州刺史契丹孫萬榮
亂循撫境內獨無驚擾盟書褒美長安中七遷秋官侍郎忤張
昌宗復刺定州轉晉州名授司府少卿會卿侯知一專厲威嚴

史爲語曰不畏侯卿杖祇畏尹卿筆俄加銀青光祿大夫神龍
初擢大理卿馭韋月將罪死得流嶺南復因爭三思諷所司加
法殺之御史大夫李承嘉希意以他事劾思貞再守青州治有
異績蠶至一歲四熟黜陟使路敬潛表其善政致祥睿宗召授
將作大匠封天水郡公坐損金仙玉真二觀夫匠爲竇懷貞請
護待罪求去不許懷貞誅拜御史大夫累遷戶工二部尚書致
仕卒年七十七贈黃門監諡曰簡生平前後歷十三郡皆以清
最著聞時論稱之

李傑本名務光相州陰陽人後魏并州刺史寶之裔孫少以孝
友著稱擢明經第解褐齊州參軍遷累天官員外郎明敏有吏
材甚得時譽任山南採訪使時戶口凋蕩衆力兼并綱繩下戶
乃爲設科條防檢亡匿區處得宜復業者十七八神龍中轉衛

尉少卿河東巡察黜陟使課最諸道先天中進陝州刺史始置水陸發運使以傑爲之開元初改河南尹勤於聽斷行坐食飲不爲少廢官無留事人吏愛之有寡婦告子不孝使人迹之出與一道士語逮捕按問得其姦杖殺之郡稱神明舊廢梁公堞不治漕運艱阻調汴鄭丁男役作事不費而利入民獲其便俄代宋璟爲御史大夫將劾京兆尹崔日知貪暴不法反爲所構侍御史楊瑒廷奏糾彈之司若遭恐脅以成姦人之謀御史臺固可廢矣上以其言切直令傑依舊視事貶日知歙縣丞尋以護作橋陵封武威縣子坐引監護判官王旭贓敗出爲衢州刺史遷揚州大都督府長史卒贈戶部尚書

鄭惟忠宋州宋城人第進士補井陘湯陰二尉天授中應制舉名見廷中武后問何事爲忠對曰外揚君之美內正君之惡后

善之擢左司禦曹參軍遷水部員外郎后幸長安命待制加朝散大夫遷鳳閣舍人中宗立擢黃門侍郎時議禁嶺南酋不得畜兵惟忠奏謂善爲政者必因其俗恐禁之反擾遂止進大理卿節愍太子兵敗守衛註誤皆已流遣諸韋黨復請加誅帝欲改議惟忠奏失信天下且反側不自安遂令百司參論卒不易金貨爲多俄拜御史大夫持節賑給河北道許黜陟守宰選奏稱旨封滎陽縣男開元初遷禮部尚書轉太子賓客卒贈太子少保

許景先義興人曾祖緒武德時佐命有功歷左散騎常侍封真定公遂家洛陽景先登進士釋褐夏陽尉神龍初獻報慈閣賦擢左拾遺累給事中開元初賜禁衛射物屬歲儉府庫不充奏以古制不存典章多闕旣不足以觀德又未足以威遠耗國損

人且為不急。衆官既多。鳴鏑亂下。以苟獲為利。偶中為能。素無五善之容。頗失三驅之禮。近河南北水滂處多。豫毫兩州俱遭旱。損林胡小蕃見寇郊。壘不斷。軍書願待寇寧。歲稔。率由舊章。言過切直。外補滑州司士參軍。復中手筆俊拔。茂才異等。二科轉揚州兵曹參軍。還為左補闕。宋璟為相。擢殿中侍御史。抔按不避近。溫俄轉中書舍人。知制誥。文詞雅厚。張說常曰。許舍人文雖乏。峻峯激流。漸絕之勢。然多豐美。得中和之氣。足稱一時之秀。十年伊汝溢。因說源。乾曜公方任元弼。災青所降。宜發德音。遣大臣存問。失職罪已。引咎以答天譴。乾曜遠白遣陸象先持節。嚴贍進。吏部侍郎十三年。帝自擇十一人治行。以景先任虢州兵部侍郎。鄭溫琦邠州大理少卿。袁仁敬杭州鴻臚少卿。但志廉襄州衛尉少卿。李昇期邢州太僕少卿。鄭放定州國子

司業蔣挺湖州左衛將軍裴觀滄州衛率也誠遂州皆爲刺史
詔宰相諸王御史以上祖道洛濱奏太常樂盛具帛舫水嬉命
高力士賜詩帝親書且給紙筆令自賦資絹三千疋之後徙岐
州復爲吏部侍郎卒

潘好禮貝州宗城人自少與同鄉孟溫禮爲莫逆交擢明經選
上蔡令治最擅監察御史坐小累復除芮城令拜侍御史徙岐
王府司馬居後母喪固辭奪服不出開元初爲邢王府長史從
王刺滑州爲府司馬知其州事王御下不肅仍令檢督凡過失
皆上聞王好游觀諫諭禁切復農月出獵遮道諫不從臥于馬
下呼曰禾苗在田王何得非時暴殄以損下人要先踐殺司馬
然後聽所爲王慙爲還還豫州刺史勤力于治清廉無所私然
喜察細事下吏雖憚其嚴亦厭其尅復以公累徙溫州別駕卒

爲人博學能論議節行修整無所傾附未嘗自列階動居室服用粗陋形骸若土木世謂近名

倪若水字子泉恆州藁城人擢進士累遷右臺監察御史黜陟劔南道繩舉嚴允奏課第一開元初歷中書舍人尚書右丞出爲汴州刺史政尚清淨人吏安之增修孔廟興學廡勸勵生徒身爲教誨風化興行士人稱詠不已會遣中人於南方捕鵝鵠鵝鵠上言農方田婦方獄輒於此時捕奇禽怪羽爲園築之玩自江嶺而南達于京師水運陸齋所飼魚蟲稻梁下民爭以賤人貴鳥爲嘗常聞往聖以鳳凰爲凡鳥麒麟爲凡獸此等有何可愛帝手詔褒答悉放所玩譴譴內使賜帛四十段時天下久平朝廷尊榮人皆重內任自以常任綱轄雖擢方面猶謂下遷適班景偕自揚州採訪使入爲大理少卿過汴餞之郊外顧左

右曰班公是行若登仙然吾恨不得爲騶僕未幾入爲戶部侍郎七年復授右丞卒

韋恆與弟濟宰相嗣立之子恆開元初爲碭山令政尚寬惠吏民愛之值上東巡州縣供張皆鞭朴趣辦恆不立威而事給姑子宇文融爲御史中丞薦其有經濟才讓以已位擢殿中侍御史歷度支員外左司郎中太常少卿給事中隴右道黜陟使至河西劾奏節度使蓋嘉運恃托中助橫恣不法妄列功狀人不堪懼由是威令大著後終陳留太守 濟早有時望從容雅度初調郟城令玄宗試理人策罷居第一轉醴泉令以簡易臨政民庶安之由庫部員外四遷戶部侍郎轉太原尹修飾政事著先德詩四章述祖思謙伯承慶及父之行人稱典懿天寶中改河南尹入爲尚書左丞三世居是職衣冠榮之後終馮翊太守

子與夏縣令亦以能政聞

李惠登營州柳城人爲平盧軍裨將祿山亂從董秦泛海略定滄棣等州輕兵遠鬪賊不能支復陷史思明以計挺身走山南依節度使來瑱表試金吾衛將軍李希烈反屬以兵二千使屯隋州惠登挈州以歸卽拜刺史州數被亂原野閑曠寂無人居復鮮定業惠登素淳朴不知學問然能視人所利行之所害去之率心所安暗與古合凡居二十年田畝墾闢戶口日增人歌舞之始升隋爲上州節度使子頌狀其績詔加御史大夫俄檢校國子祭酒卒贈洪州都督

蕭定字梅臣宰相瑀曾孫父恕虢州刺史定以蔭起授陝州叅軍轉金城丞吏事清幹黜陟使裴遵慶奏爲選補判官回改萬年主簿累遷侍御史考功員外左右二司郎中爲元載所擠出

爲秘書少監兼袁州刺史歷信湖朱睦潤五州刺史所涖咸有政聲大曆中有司條天下牧守課績理行以爲第一其勦農桑均賦稅逋亡歸復戶口增加定又冠焉尋遷戶部侍郎至太常卿朱泚反變姓名藏匿里閭事平首蒙旌擢除太子少師卒年七十七贈太子太師

崔瓘博陵人素以士行聞涖職清謹累官至澧州刺史下車削去煩苛居二年風化大行人便安之流亡極負而至增戶數萬所司以聞詔特進五階至銀青光祿大夫以寵異政大曆中遷渾州刺史兼御史中丞湖南都團練觀察使到官政尚簡肅恭守禮法將吏自經時艱習於寬弛多不奉法瓘稍以禮法繩之恆伏隱怒會別將臧玠與判官達奚覲忿爭殺覲瓘聞難惶懼走遇害代宗悼惜之

孫成字思退。父遜。別傳。成初蔭補雲陽尉。歷監察殿中侍御史。代宗時轉屯田員外郎。長安令。遷倉部郎中。京兆少尹。出爲信州刺史。有惠政。歲旱。發粟以賤直售。民饑而不害。反增戶五千。詔書褒美。郡人立碑頌德。徙蘇州。改桂管觀察使。卒。生不通經術。奏議据正性。復友悌。聞兄宿有疾。不待報輒往。華州存視。上聞不加責。及喪。弔者至。不易纊。而見客疑之。答曰。纊者古居喪常服去之。則廢喪。其篤誼若此。子公器。官亦至邕管經略使。

羅珣。會稽人。父懷操。珣寶應初詣闕。上書授太祝。署曹王。臯江西荆襄節度幕府。累至副使。臯卒。軍亂。劫府庫。珣斬首惡十餘人。以徇。環棘廷中。俾投所劫庫物。一日皆滿。乃貫餘黨名爲奉天令。中官出入犯禁。悉皆屏息。擢廬州刺史。下令變民俗。尚淫祠。棄醫藥。復修學宮。政教簡易。有芝草生其庭。白雀來巢淮南。

節度杜佑上其治狀賜金紫再遷京兆尹請減平糶半以常賦
克之人賴其利以老病求解徙太子賓客累封襄陽縣男卒諡
曰夷 子讓字景宜文學有譽舉進士宏辭賢良方正皆高第
爲咸陽尉父喪幾毀滅服除布衣糲飯不應辟署十餘年淮南
節度李鄜卽所居敦請除監察御史轉殿中侍御史歷尚書郎
遷福建觀察使兼御史中丞有仁惠名或以婬遺問所從慘然
歸之入爲散騎常侍拜江西都團練觀察使兼御史大夫卒年
七十一贈禮部尚書子劬京字子峻從子劬權字昭衡皆登進
士有名于時

薛珽字溫如河中寶鼎人祖寶胤邠州刺史父紘蒲州刺史珽
少以門蔭爲懿德太子廟乾靈臺并昭應皆爲令清白著聞課
最第一遷楚州刺史本州營田使初至奏獨宰相遙領俸給百

餘萬厨役三千戶爲觀察使所嫌誣授峽州刺史轉陳州建中
初黜陟使李承趙贊盧翰連稱其簡廉清肅進階中散大夫賜
金紫劉玄佐裝授汴宋行軍司馬兼御史大夫李希烈走還卽
拜汴州刺史遷河南尹入爲司農卿時詔舉堪任刺史縣令者
欲校以文詞珣曰求良吏不可責文學宜體上愛人之心爲本
延問人問疾苦吏治得失宰相多其計所用皆稱職遷京兆尹
司農供三宮蓄茹不足請市京兆珣使萬年令韋彤禁鬻寶德
宗怒奪二人俸坐善寶參改太子賓客出爲嶺南觀察使卒年
七十四贈工部尚書爲人剛嚴曉法勤身勸下然好苛察無經
術大體子存慶字嗣德登進士歷御史尚書郎遷給事中與韋
弘景並執封駁時稱其直穆宗令宣慰幽州劉總至鎮州疽發
背卒贈吏部侍郎

裴向字儵仁宰相建慶子初蔭補太子司議郎建中初同州李紆奏署判官李懷光叛紆奔奉天向領州務懷光遣將趙貴築壘於同脅吏督役不及期將斬以徇民皆駭散向獨詣壘開諭貴乃降同賴不陷皆其力也累爲櫟陽渭南令奏課皆第一擢戶部員外郎選授太原少尹擢行軍司馬兼御史中丞歷河東節度副使同州防禦陝虢觀察使入爲大理卿拜左散騎常侍以吏部尚書致仕卒年八十贈太子少保生平歷官仁愛推利及人能以學行持門戶內外親屬百口均以祿俸世稱孝睦子寅登進士官累御史大夫孫樞

韋丹字文明萬年人周大司空孝寬六世孫高祖琨爲太子承乾洗馬太宗知其善諫擢給事中高宗在東宮復爲中舍人封武陽縣侯孝敬時至右中護終於詹事贈秦州都督諡曰貞丹

蚤孤從外祖顏真卿學以蔭讓庶兄入紫閣山事從父能舉五
經高第歷咸陽尉張獻甫表佐邠寧幕府遷殿中侍御史順宗
爲太子名爲舍人拜司封郎中往弔新羅國君故事賈州縣十
官取貨以充私覲丹其疏寧取于上無寧買官受錢詔有司給
與因著爲令還爲容州刺史仁化大行教民種茶樹麥服勞耕
織止惰游興學校民貧自鬻者贖歸之禁吏不得掠爲隸久之
名爲諫議大夫紳有直聲憲宗誅劉闢使代李康爲劔南東川
節度使至漢中言康守禦方盡力不可易名遷拜晉慈隰三州
觀察使封咸陽郡公闕歲徙江南西道在職計口受俸委餘於
官罷八州冗食者收其財教民陶冶度材於場不取贏利人能
爲屋者官授材瓦逃未復者代以營之貧不能償則畀而免且
身往勸督歲旱募人就功因得受直復置南北營以舍軍東西

開衝七里以廢倉爲新廐馬息不死築堤扞江長十二里疏以
實凡爲陂塘五百九十八所灌田萬二千頃有吏主倉十年爲
權吏所奪覆其糧悉召諸吏約與免罪期一月還之無敢違卒
年五十八宣宗讀元和實錄見丹政事卓然語宰相先朝治民
孰爲第一周墀對臣嘗守江西韋丹有大功德被八州歿四十
年老幼思之不忘乃詔觀察使紇于衆勸功于碑 子宙廢調
河南司錄參軍表李珣河陽幕府宣宗拜侍御史三遷度支郎
中爲太原盧鈞節度副使時回鶻入塞剽殺吏民令往鑄諭自
定襄至雲中視亭障增守卒約吏不得擅侵諸戎於是三部六
蕃酋豪信悅名拜吏部郎中出爲永州刺史州方災歛盡斥官
下供應什物轉爲市糴俗多觸罪不知法戶給律書并生理種
植之宜先期擬定十家相保省督戕吏又劾常生倉以待饑乏

罷冗役九百四十四員歲苦貢零陵香爲奏停之民乏牛力爲
置社月會其錢探名得者先市以爲準復立學宮教仕民子弟
俚俗婚姻出財會衆號破酒少年擊鼓擊入民家爲辦具號起
盆喧呼痕鬪一切禁之遊爲大理少卿久之拜江西觀察使政
復簡易父子能世其家遷嶺南節度使南詔陷交趾撫兵積備
以幹濟聞加檢校左僕射同中書門下平章事以弟岫女妻小
校謙後生二子卽南漢隱皇 岫字伯起爲泗州刺史亦有
名盧攜初應舉貌陋謂必大川後果執政擢福建觀察使
出戎守可大宰相玄暉從孫祖嬰郢州刺史父貞固榆次令戎
舉明經補太子校書郎書判入等調藍田簿梓淮南李鄜府憲
宗稱其才代者衛次公倚重之又署裴度太原節度叅謀王承
宗叛令單車往諭至泣下聽命入爲殿中侍御史累吏部郎中

諫議大夫雲南蠻寇成都詔持節兩川宣撫奏罷稅外蕪芋錢
常賦者率三分一準給布優其估以厚民綏招流亡凡所廢置
公私莫不便之還拜給事中駁奏爲時所稱未幾出爲華州刺
史故事私用錢日萬緡咸不取會徙充海沂密觀察使臨行曰
毋重矯激以夸後乃以享軍人民戀惜擁留取其靴以去至充
鉏滅姦吏十餘輩民大喜歲餘卒年五十五贈禮部尚書子雍
字順中山起居郎出爲和州刺史以不能抗龐勛賜死

馬總字會元扶風人系出伏波裔少孤不妄交游長性剛直優
於理道貞元中辟署滑州姚南仲幕府監軍薛盈珍誣南仲不
法貶總泉州別駕盈珍入掌樞密福建觀察柳冕希意欲誅之
賴同事薛戎移贊保護得免徙恩王傅元和初遷虔州刺史四
年兼御史中丞充安南都護兼經略使在任廉清不撓政事嘉

美悉用儒術以教其俗仍建銅柱於澳故處創著唐德傑耐安
之就賜金紫徒柱管經略觀察使入爲刑部侍郎裴愛宜慰淮
西奏爲副使兼御史大夫吳元濟尙留掌彰義後事蔡久陷賊
人習僞惡有螿猶風爲設教令明賞罰磨治洗汰俗如一變奏
改彰義爲淮西就拜節度使踰年徙忠武充華州防禦鎮國軍
使李師道平析郟曹濮等爲一道賜號天平軍復除觀察使及
劉總上幽鎮地徙鎮天平穆宗召總還將大用之劉總旋卒復
詔選鎮加檢校左僕射郟人附賴之二年入爲戶部尚書生平
沈毅篤學有大臣風雖吏事倥偬不肯去前論著頗多卒贈右
僕射諡曰懿

薛戎字元夫河中寶鼎人少有學術不求聞達居毗陵之陽羨
山年餘四十操常不改江西李衡辟爲觀察從事使者三返方

應故相齊映代衡復留署職府罷歸山又赴柳冕辟轉殿中侍御史權領泉州事以不從誣構馬總反列寃狀冕怒構戎罪拘於佛寺環兵脅守恣其侵辱併誘總罪竟不爲動淮南杜佑知其寃爲上表會冕死方解辭職寓居江湖閻濟美代冕備聞其事奏克副使又隨移鎮浙東改侍御史入拜刑部員外郎出爲河南令歷衢湖常三州刺史浙東觀察使以疾辭官年七十五卒贈左散騎常侍生平檢身處約休入之餘悉散宗族所蒞不尚約束詭名譽有善悉歸之所部故居任時無灼灼可驚者已去則思之身歿之後人亦無譏

閻濟美爲人謹厚長者登進士累歷臺省貞元末歷婺潤二州刺史累福建浙西觀察使所至以簡澹爲理兩地之人常賦之外不知其他常以家財進奉憲宗初入拜右散騎常侍時詔令

一切禁止濟美在道方見其所貢獻未能撤還中丞盧坦劾之與山南柳晟皆白衣待罪帝論坦曰二人所獻皆家財朕已許原不可失信坦曰所以布大信者赦令也今二臣違詔陛下奈何以小故失大信乎帝曰朕既受之奈何坦曰出歸有司以明陛下之德帝納之尋出爲華州刺史潼關防禦鎮國軍使入爲秘書監年老乞骸進工部尚書致仕卒年九十餘諡曰溫

薛萃與戎同縣七世祖道實隋禮部尚書父胤奉天尉與楊國忠有舊將引用之輒謝去萃素工詩由吏事進累官至長安令遷虢州刺史以最歷湖南浙東兩觀察使咸有治行復遷浙西加御史大夫累封河東郡公所居守法度務在安人持身儉薄一袍十年由緜改緋方易不樂聲利祿俸常分親故家無餘藏憲宗嘉之名除左散騎常侍引年乞休詔許致仕卒年七十四

贈工部尚書諡曰宣 兄芳亦有器幹萊與莘之母卽代宗從
母也以外戚奉朝請皆贊善大夫 莘子蔚太和初爲右補闕
內供奉聞弟齊佐典元幕府同李絳遇害不及聞請卽馳赴之
哀臨不勝聞者酸泣後歷工部員外郎

盧弘宣字子章元和初擢第辟鄭權襄陽幕府李愬與權交憾
往代之日弘宣謁之愬敕左右謹衛旣而與語見其沖遠不覺
沈然裴度表爲東都留守判官遷累給事中封還駙馬韋處仁
魏州刺史詔勅開成中山南江西大水詔與吏部郎崔瑋分道
賑恤遷遷京兆尹刑部侍郎拜劔南東川節度使時歲饑盜贅
結酋豪僭號爲王僞署官吏發教脅招亡命聯蓬瀛嘉榮儲州
誅蠻落搖亂根株磐熾弘宣遣吏誅其魁長脅諭強黠署之軍
中餘黨還農徙義武節度使至則除軍中偶語故法有詔賜其

軍粟三十萬斛貯飛狐計稅費不能滿直敕吏守之春適大旱
令民隨力往取卽相假貸時幽魏饑甚獨易定自如至秋悉收
所貸軍食以饒歷工部尚書秘書少監以太子少傅致仕卒年
七十七贈右僕射爲人性寬厚政目簡省人便安之患士庶人
家祭無定儀乃合十二家損益其當次以爲書子告字子有及
第終給事中

何易于爲人性廉約素不擾民爲益昌令距州四十里刺史崔
朴常乘春與賓屬汎舟易于身自往引朴驚問故對曰方春百
姓耕蠶惟令不事可任其勞朴愧與賓客疾驅去鹽鐵使權取
茶利封還其書曰縣人不征茶且不可活吾敢愛一身移暴于
民觀察使素賢之不劾也民有死喪不能具葬以俸給之名高
年者令坐以問政之得失民有闕在廷丁寧指曉枉直遣之不

以付吏在官清肅獄三年無囚督賦役不忍迫白饋給往來符
傳外一無所進故無異稱以中上考選羅江令卒

冊曰有唐更化內外仰成武德綏乂貞觀厚生開元妙選
元和厲聲大中思治韋丹顯名協氣嘉生燕爲太平

州以完安時頡利可汗方彊每有求取書輒稱敕沿邊吏奉承不敢卻獨儉拒而不受太宗嘉之李靖既平突厥有恩結部者窮歸于儉受而安輯之未徙者尚在磧北私相過省不爲禁止及儉徙勝州都督代者不察奏以爲叛議兵進討儉時居母喪奪服使撫納之乃單騎入其部召酋帥慰諭布以腹心咸徇歸命因便徙代州就命爲代州都督勸以墾田力耕蓄斂富實又恐戎人易驕官爲平糴彼此大獲利益遷營州都督兼護東冀校尉所部與契丹奚皆鞅鞞諸蕃切診邊師興詔率蕃兵先進略地至遼西川漲久未得渡帝以爲畏懦召還見洛陽宮陳水草美惡山川險易并久不進狀帝悅復拜行軍總管仍領諸蕃騎爲前鋒渡遼趨建安城賊徒大潰斬級數千復其祖爵厚復賞賜會改東冀校尉爲都護府卽以命之永徽初加金紫光

祿大夫年六十卒於官諡曰密 兄太師以軍功至太僕卿華州刺史武功縣男弟延師左衛大將軍范陽郡公性謹畏典羽林兵三十年未嘗有過卒贈荊州都督諡曰敬陪葬昭陵兄弟門皆立戟時號三戟張家

郭孝恪許州陽翟人少有奇節不治貲產隋亂附李密使與徐世勛守黎陽密敗勛遣孝恪送款于唐封陽翟郡公拜宋州刺史命與勛經略武牢以東所定州縣委以選補寶建德援洛陽孝恪獻計秦王以爲天速其亡請固守武牢屯軍汜水逐機應變禽珍必矣王然之賊平大會諸將置酒洛陽宮王曰孝恪謀擒建德之策王長先龍門下潛之功皆在諸君右拜爲上柱國歷貝趙江涇四州刺史所至有能名入爲左驍衛將軍累加金紫光祿大夫貞觀十六年拜涼州都督改安西都護其地高昌

舊都流徙罪人與鎮兵雜又限沙磧與中國隔絕孝恪推誠撫御盡得其歡心高昌初鹵焉耆生口七百滅時詔盡還之及是焉耆王叛歸欲谷設孝恪請擊之卽拜西州道行軍總管率步騎三千出銀山道伺其機便乘夜襲之鹵其王龍突騎支以獻帝悅璽書褒勞俄拜崑丘道副大總管進討龜茲破其城入居之其相那利遁去餘部尚未平孝恪出營於外那利陰合作兵內外爲應與闕中流矢卒子待詔亦歿將軍曹繼叔進兵復拔其城太宗初責以不加警備奪其官後又愍其死職更爲舉哀高宗追還官爵封陽翟郡公子贈游擊將軍賻物三百段孝恪性奢侈僕妾器玩務極鮮華雖在軍中牀帳完具嘗以遺行軍大總管阿史那社爾一無所受太宗聞之以定二將優劣次子待封官左豹韜衛將軍待聘宋州刺史

常達陝人仕隋爲鷹擊郎將嘗從唐王征伐甚蒙親待及義兵起乃以隋命從宋老生拒戰霍邑旣降達匿不見意其已死久乃自歸王大悅命爲統軍武德初拜隴州刺史薛舉屢攻之不克收其子仁果斬首千級舉遣其將仵士政給降達不疑其詐遂爲所劫并其衆二千歸舉衆幸以見詞色抗厲不爲之屈竟釋之仁果平達尚在帝見勞曰君之忠節無愧古人爲執士政殺之賜達布帛三百段復拜隴州刺史卒

呂子臧蒲州人性剛直健於吏治隋末爲南陽郡丞捕賊有功高祖克京師遣安陸人馬元規以隊正慰輯山南子臧方爲隋堅守元規遣士諷曉被殺及煬帝已弒帝更使其婿薛君倩齎詔諭之子臧發喪成禮而後歸國就拜鄧州刺史封南陽郡公武德初使與元規并力攻朱粲勸以乘賊新敗上下惶沮一戰

可禽若遲之其衆稍集爭來致死不可當也元規無謀遷延不納請以所部兵獨進又不許俄而衆勢復張果圍城會霖雨雉堞崩剝子臧扼腕嘆謀不見用或勸其降不肯已而城陷與元規皆死。

馮盎字明達高州良德人本北燕馮弘裔孫北魏時弘舉國奔高麗遣子業以三百人浮海歸晉弘已滅業留番禺至孫融事梁爲羅州刺史子寶聘越大姓洗氏女爲妻遂爲首領授本郡太守盎乃三世孫隋仁壽初爲宋康令使發江嶺兵討潮成等五州叛獠有功拜漢陽太守從征遼東遷左武衛大將軍隋亡奔還嶺表署會領有衆五萬破番禺新興賊高法澄洗寶徹等寶徹兄子智臣復聚兵拒戰盎進討兵始合釋冑大呼若等識我耶衆委戈袒而拜賊遂潰禽寶徹智臣遂有番禺蒼梧朱崖

地自號總管武德五年始以地歸高祖析為高羅春白崖儋林
振入州拜益上柱國高州總管封越國公子智戴春州刺史智
或東合州刺史俄徙封耿貞觀初或告其叛太宗召右武衛將
軍蘭譽發江淮甲卒將討之魏徵諫曰天下初定剋夷未復大
兵之餘疫癘方作且王者兵不宜為蠻夷動勝之不武不勝為
辱且盜不及未定時略州縣搖遠襲今四海已平反狀未露當
懷之以德盜懼必自來帝乃遣散騎常侍韋叔諧喻益益遣智
戴入侍帝曰微一言賢於十萬衆五年益來朝宴賜甚厚俄而
羅賓諸洞獠叛詔益為諸軍先鋒賊據險不可攻益持弩語左
右曰矢盡勝負可知發七矢斃七人賊退走益縱兵乘之斬首
千餘級帝詔智戴還慰賞甚厚益善為治閱簿最撓姦伏得民
歡心卒贈左驍衛大將軍荊州都督子三十人智戴知名勇而

有謀能撫衆得士死力會仲皆樂屬之嘗隨父至洛陽統本部
銳兵宿衛煬帝被弑引其下逃歸時盜賊多嶺嶠路絕智戴轉
戰而前至高源俚帥膺爲謀主會盜至得與俱去後入朝帝勞
賜加等授衛尉少卿太上宴未央宮智戴得侍令賦詩笑樂又
聞其善占驗指雲樹問曰下有賊今可擊乎對曰雲狀如樹方
辰在金金利木柔擊之勝帝奇其對累遷左武衛將軍卒贈洪
州都督

張知審字匪躬幽州方城人徙家于岐兄弟五人知玄知晦知
泰知默皆勵志讀書明經高第曉吏治清介有守公卿爭爲引
重迺歷終赤并臺省有名調露時知審爲監察御史裏行歷房
德定洛等十一州刺史所蒞有威嚴人不敢犯璽書屢降存問
萬歲過天中入覲天后奇其狀貌語曰人或有才未必外稱卿

家兄弟可謂兩絕。詔王闢之。又門皆列戟。白雀來巢。數加寵賜。中宗在房州。吏多肆慢。知審衙盡誠推奉。與前後刺史董玄質。崔敬嗣。疊相保護。不少弛。復位。屢加左衛。并雲麾將軍。封范陽郡公。歷東都副留守。左右羽林大將軍。致仕。卒。年八十。其人敏且亮。惡請托。求進不才。冒位者。視之若讐。每救子孫。經不叩。不得應。舉其家法如此。知玄歷大理卿。同華二州刺史。子景昇。

知泰。通天中。爲洛州司馬。進右臺御史大夫。加銀青階。封漁陽郡公。伯仲華。首同貴。時以爲榮。後忤武三思。出爲并州刺史。天兵軍使。終魏州刺史。諡曰定。子景佚。皆顯官。知晦。歷益州長史。御史中丞。尚書左丞。兵部侍郎。封陳留郡公。後因知默。陷於酷吏子孫。禁錮爲張氏羞。

崔光遠。系出博陵。後徙靈昌。祖敬嗣。爲房州刺史。中宗德其擁

護及反正訪之已死。卽授其子汪五品官。汪生光遠。未經同學。勇決任氣。頗有祖風。開元末。爲唐安令。與楊國忠善。累遷京兆少尹。充吐蕃中祭使。還當西幸。留爲京兆尹。西京留守。兼採訪使。都人乘亂入宮。爭輦財寶。火左藏。大盈庫。光遠與邕合誠號。令救火。斬其人。乃定。又使子東見祿山。追還所署京尹。張休以授光遠。乃募官攝府縣。俄而賊黨同羅自恃。賊將孫孝哲安神。威招之。不能得。光遠懼。與長安令蘇震同奔靈武。擢御史大夫。復尹京兆。仍使於渭北。召集吏民之來歸者。會賊黨劉涇陽。休止僧寺。推牛呼飲。光遠使百騎。殺滿徂其前。命驍士合謀。斬其徒二千。得馬千。噉俘一酋。長以獻。自是賊常避其鋒。肅帝還。改禮部尚書。封鄴國公。實戶三百。乾元元年。兼御史大夫。汴州刺史。子儀與賊賊汲郡。命光遠往。授轉魏州節度使。遣將李處叅。

拒戰奔還賊傳城詭呼處峯名我光遠信而斬之衆以處峯善戰方賴爲重及死人心益危遂不能守潰圍奔于京師帝救其罪拜太子少保充山南東道都兵馬使持節討襄州叛將康楚元張嘉延又徙鳳翔尹充秦隴觀察使招降岐隴賊郭情等晚年不親戎事好捕飲惰等陰約党項及奴刺敗韋倫并殺監軍帝怒召還復使節度劔南東川討平段子璋不能禁城縱士卒剽掠帝詔監軍按其罪以憂卒

韋倫京兆人父光乘朔方節度使以蔭調藍田尉幹力勤濟爲錢錢并內作使判官楊國忠恃權多發州縣農人鼓鑄斧非所習雖經筆扶無功請準直募匠以代役用減而鼓鑄多玄宗晚節盛營宮室內作人吏因緣爲姦倫乃躬親閱視倍減費用改大理評事車駕幸蜀拜監察御史劔南節度行軍司馬兼充

頓判官時中人衛卒多侵暴難治倫以清儉自將西人賴濟竟

因讒嫉貶衡州司戶屬東都河南漕運路絕第五琦薦其才擢

商州刺史兼理荆襄道租庸康楚元亂調兵屯鄧州厚撫降賊

寇益息乃擊禽楚元以獻收租庸二百萬緡召爲衛尉卿俄兼

寧隴二州刺史乾元中襄州亂拜山南東道節度使爲李輔國

所憾罷刺秦州党項入寇兵寡而敗貶巴州長史徙務川尉代

宗立連拜忠台饒三州刺史宦者呂太一反嶺南移韶州刺史

韶連郴都團練使爲太一反間貶信州司馬斥棄十年德宗嗣

位擢太常少卿再使吐蕃論天子威德贊普順悅入獻還進卿

兼御史大夫數論得失盧杞惡之改太子少保從狩奉天泣涕

言杞與志貞趙贊關播等奸惡無狀使天子至此尚不失爲尚

書後何以勸聞者憚其公進太子少師封郢國公致仕居家以

孝慈稱上言李楚琳逆節不當兼衛尉卿李忠誠戎隗不當兼少府監又請爲義倉以捍無年擇賢者任帝左右吐蕃豺虎野心不可事信約宜謹備邊帝善其言厚禮之卒年八十三贈揚州都督諡曰肅

李叔明字晉卿潤州新政人世爲右族本姓嚴少孤養于外家又姓鮮于兄仲通字向卿以交楊國忠至劔南節度使兄弟皆涉學輕財務施叔明擢明經亦爲國忠劔南判官乾元中除司勳員外郎副王瑀使回紇折其恃功倨傲可汗爲加禮復命遷司門郎中東都平拜洛陽令招徠遺民號能吏擢商州刺史上津轉運使代宗時奏改今姓列于屬籍遷京兆尹兼御史中丞長安歌曰前尹赫赫具瞻允若後尹熙熙具瞻允斯久之以疾辭起爲太子右庶子崔寧亂出爲邛州刺史寧入朝拜東川節

度使兼御史大夫徙治梓州承兵盜之後鄉邑彫破撫按有方
在治二十年華萼靖安請定本道寺爲三等觀爲二等上寺留
僧二十一上觀道士十四每等降殺以七皆擇有行者充餘還
爲民不使農夫蠶婦墮業以避役德宗善之下尚書雜議通行
天下建中初吐蕃蕩火并掠龍州陷扶文遠三州叔明分五將
擊走之以功加檢校戶部尚書平梁崇義引兵下峽戰荆門遷
檢校左僕射駕幸興元又山家貲助軍悉衣幣獻宮掖嚴戒子
昇以死報國還京封薊國公後朝京師病足令宦士肩昇以見
拜尚書右僕射乞骸改太子太傅致仕卒諡曰襄 昇以少卿
從幸梁州有功擢禁軍將軍貞元初遷太子詹事兼御史大夫
與父同坐郃國公主貶羅州別駕家素豪侈歿後數年子孫驕
縱蜀貲產皆盡世更以爲鑒

嚴震字遐聞梓州鹽亭人。世業農。以財雄閭里。至德乾元中。數
出家財助邊。東川節判韋收薦於節度嚴武。授合州長史。武移
西川。奏署押衙。改恆王府司馬。以宗姓。故多委以軍府衆務。歷
循尉。太常二少卿。武卒。罷歸。李叔明奏爲滄州刺史。移疾去。又
表鳳州判史。加侍御史。母喪解起。爲興鳳二州團練使。爲政清
嚴。興利除害。遠近稱羨。建中初。黜陟使韋植狀其治行第一。賜
上下考。進階開府儀同三司。兼御史中丞。封郿國公。治鳳十四
年。命代賈耽爲梁州刺史。兼御史大夫。山南西道節度觀察等
使朱泚遣腹心穆延光等。賞帛書誘之。徇斬以聞。帝患李懷光
與泚連和。欲徙蹕山南。震仰馳表奉迎。遣大將張用誠領兵五
千扞衛。用誠至。蓋屋有反謀。帝憂之。會震又遣牙將馬勛至。告
之以故。勸請歸取節度符名之。卽不受。斬以復命。帝悅。使計日

往助還得符。偕壯士五人出駱谷。用誠方舉數百騎來迎。助館之。時天寒冽。令焚草館外。士爭附火。助出懷中符示用誠曰。大夫名君。用誠懼。將走。壯士自後禽之。其子引刀斫助傷首。左右救免。格殺之。時軍士皆已擐甲。助昌言。大夫取用誠若等無與。忍乘其父母妻子。衆不敢動。卽送用誠於震。杖殺之。而拔其副。以統師。約甫踰半日。帝喜助顏色。翌日遂發奉天。整衆而行。既入駱谷。懷光遣騎追襲。賴以得脫。加震檢校戶部尚書。封馮翊郡王。賜實封二百戶。助鳳州刺史。駕至梁。宰臣議地頗儉。卽給不敷。請幸成都。震奏山南密邇畿輔。李晟銳於收復。方藉六師。爲聲援。遠引而西。恐諸將傾望。責功無期。帝未決。會晟表至。議遂定。其實刀耕火耨。民資采稻爲食。雖領十五郡。而賦額纔比東南數大縣。自安史後。山賊剽掠。戶口流散。震隨宜勸課。鳩斂。

有法民不煩擾而行在供億具焉駕將還加檢校左僕射并梁州爲典元府卽用爲尹貞元初郊恩進同中書門下平章事十五年卒年七十六贈太保諡忠穆從弟礪字元明少爲浮屠太守偉其材表玄武尉震在山南署牙將德宗臨幸主饋有功遷都虞候爲人輕躁多姦謀以便佞自將擢累興州刺史兼監察御史震卒遺言權主留務薦拜本道節度使在位貪吝苟得士民不勝其苦誣奏馬助貶賀州司戶劉闢反以儲備有素加檢校左僕射兼領東川擅沒吏民田宅百餘所稅外加斂錢及芻粟數十萬卒後御史元稹劾發其賊但追田宅奴婢還主不奪所斂得贈司空從孫諤與宰相楊收善咸通中由桂管觀察使擢爲江南節度使改號鎮南軍詔募士三萬以備南蠻內寇及收得罪人言譏廣補士卒擅納繼廩韋保衡遣使按覆詔

賜死

崔寧本名旰貝州安平人徙衛州家世業儒寧喜縱橫術客遊
劍南初事鮮于仲通司馬崔論薦爲牙將歷事崔圓裴冕冕被
謗爲勞耳白其寃名留京師任折衝郎將竇應初蜀山賊寇亂
嚴武奏除利州刺史賊隨解散漸以聞名移刺漢州善撫士卒
麾下咸願致死會吐蕃引雜羌寇西山破柘靜等州武遣寧將
而西陰爲地道入拔其城鹵鷲以爲神因拓地數百里而還武
大悅以七寶飾舉迎入成都以誇異之表爲西山都知兵馬使
武卒寧奏大將王崇俊爲節度而司馬杜濟別將郭嘉皆推郭
英又朝廷用英又乃大恨之至卽誣殺崇俊遣使名寧託拒吐
蕃寧懼不敢還英又出兵聲言助寧實欲襲之徙其家成都宣
淫妾媵寧愧益負阻英又自將討之值大雪馬凍士離遂敗而

歸寧激怒軍中恭其反狀直檄成都英又出兵障城西使柏茂
琳爲前軍英矜居左嘉琳後殿來戰帳敗軍多降寧使反攻英
又敗走寧乃入城攝治署諸郡刺史劔南大擾楊子琳與柏貞
節起兵討寧永泰二年代宗詔宰相杜鴻漸往平其亂因無大
略貪小利寧遣使獻繒錦數千辭甚卑約至鎮委以政事表貞
節邛州刺史子琳瀘州刺史以和解之上表薦寧權成都尹山
南西道防禦使西川節度行軍司馬大曆二年鴻漸還朝真授
寧節度使明年入朝留其弟寬守成都子琳乘間以精騎數千
襲據其城寬戰力屈寧妾任氏素驍果出家財募勇士千人設
部隊自將以進子琳大懼會糧盡且大雨遂逝帝聞之卽遣寧
還見朝無綱紀蜀地險遠乃痛誅敝使寬與兄審居京師厚賂
權貴深結元載父子驟擢寬御史中丞審給事中後十餘年兵

寢彊盛肆侈窮欲多汗。通將吏妻女朝廷隱忍不能詰。累加尚書左僕射十四年。入朝進檢校司空同中書門下平章事兼山陵使。俄爲御史大夫。建自御史選擇當出。自巳不宜謀及宰相。因奏李衡于結等。楊炎怒不附。巳寢而不行。又惡寧中救劉晏。會南蠻合吐蕃入寇。覆沒州縣。德宗促寧還。炎乃說帝曰。蜀天下輿壤。自寧擅制朝廷。失外府十四年矣。此行若使無功。是徒遣也。若其有功。又不可奪。勝敗皆非國家所利。帝問卿策云何。炎曰。今朱泚所部范陽勁卒。近戍畿甸。趣與禁兵同往。宜無不克。又因是得真親兵。蜀將破膽。然後換授他帥。以收千里之權。是謂因小禍受大福也。帝曰善。遂罷寧。不遣託言重臣綏靜北陲。改寧京畿觀察。朔方靈州節度。鄆坊丹延都團練等使。每道各置留後。靈州杜希全。振武王翊。鄆州李建徽。使得自奏事。及

嘗戴休顏杜從政呂希俯伺寧過失寧至夏州與希俯招降黨
項甚衆炎惡之奏罷希俯代以神武將軍陸常春更拜寧右僕
射知省事與盧杞不叶嘗謂所親上聰明從善如轉圜但爲杞
所惑爾杞聞之思構寧於帝會朱泚亂王翊赴難言其願望又
得泚反間誣以與賊通書乃召至朝堂使中人益於幕後年六
十一中外冤之貞元十二年故將夏綏銀節度韓潭請以已官
雪寧罪乃聽收葬子薨字野夫乾符中爲吏部侍郎美文辭
談辯華給以器韻自高出爲陝虢觀察使王仙芝亂坐失守貶
端州司馬終左散騎常侍寧季弟密子繪生四子鑑黯確顏
皆推華士以文辭稱鑑字越卿開成中爲戶部侍郎歷平盧天
平軍節度使終尚書左丞黯字直卿開成初爲監察御史奏
郊廟祭事不虔條具以聞擢員外郎累遷諫議大夫確字岳卿

顏宇希卿位皆郎中。子琳本蓋南賊帥來降詔諫劔南素以
妖術滅亂敗後收餘兵沿江而下諸州震怒刺史備倣卒以饗
士過黃草峽爲守捉使王守仙伏兵所擒

張建封字本立南陽人祖仁範洪州南昌令父玠少豪俠輕財
重士客隱兗州祿山令僞將李庭偉率蕃兵勸下山東城邑至
魯郡太守韓擇木懼怯具禮迎置館驛玠率魯豪張貴孫邑段
絳等將殺之擇木大懼惟司兵參軍張孚助其謀遂殺庭偉并
黨與數十事聞擇木與孚俱受官賞玠去之江南不任言功後
以子貴贈秘書監建封少屬文好談論慷慨負氣以功名爲已
任實應中蘇常盜起代宗遣中使馬日新合李光弼兵討之建
封求見請說喻賊徒不煩用兵日新從之遣入虎窟蒸黑等營
喻以利害禍福降賊黨數千悉放歸田由是知名大曆初道州

刺史裴虬薦於觀察使韋之平。平投左滑道兵曹，不樂吏職而去。復辟滑毫，令狐彰鄙其不朝，往見，轉運使劉晏奏試大理評事，筦漕務歲餘，復罷。素與馬燧友善，辟爲河陽三城鎮遏判官。除監察御史，賜緋魚袋，燧討李靈曜，吞以軍務從。鎮河東，拜侍御史，薦於楊炎，將用之。盧杞不喜，出刺岳州。會李希烈不臣，與壽州刺史崔貽通書往來，上令杞擇代者，遂白用建封。及希烈稱帝，遣將楊豐賫僞赦至壽州，建封縛徇軍中。對中使斬以聞，希烈聞之大怒，卽署其黨杜少誠爲僕射，淮南節度使令越江都先平壽州，建封遣將賀蘭元均、邵怡等守霍丘，不能侵。秩尋兼御史中丞，本州團練使。興元元年，加濠壽廬三州都團練，觀察使修葺城池，悉心綏撫，遠近悅附。自是威望益著。及希烈平，賜一子正員官。朝廷以徐州、陳、江、淮運路，思擇重臣以鎮李

泌薦拜御史大夫徐泗濠節度兼度支營田觀察等使在鎮四年創置軍伍屬事躬親性寬厚容納人過按據綱紀不妄典法未嘗枉害一卒每言事忠義感激人皆畏悅徐泗復爲雄鎮就加檢校禮部尚書進右僕射十三年入朝德宗禮遇加等不待日開延英召對特令綴大夫班以示寵異建封賦朝天行一章上獻賜名馬珍玩乘間極言宮市及進奉脚價之弊頗見采納問以詔書蜀民逋賦何如對曰此皆積累年月無可徵收雖蒙憂恤無所裨益又諭河東李悅準州盧徵病不能事左右得緣爲奸金吾大將軍李翰好伺察細事以窺寵人畏惡之詔許以後親故僚友還往常禮悉令免奏上巳曲江賜宴特令與宰相同席將還賜詩餞送又令高品資所執鞭以賜復獻詩一篇以自警勵在彭城十年號稱大治能禮賢下士無賢不肖皆優遇

之名士嚮風延頸辟許孟容韓愈爲從事十六年有疾求代用
韋夏卿爲行軍司馬未至卒年六十六開贈司徒有文章行于
時子愔初蔭授虢州叅軍權知留後判官鄭通誠懼軍士謀
亂欲引浙西還鎮兵爲援軍士怒斫庫取械環府大噪殺通誠
并楊德宗大將段伯熊吉遂曲澄張秀等上表請授愔旌節德
宗不許命割濠泗二州隸淮南令杜佑討之遣泗州刺史張仵
與徐軍戰塌橋大敗朝廷不獲已起復愔爲右驍衛將軍徐州
刺史兼御史中丞充本州團練使仍命仵爲泗州留後杜兼濠
州留後俄授愔武寧軍節度使檢校工部尚書在治七年百姓
稱理元和初以疾請代徵爲兵部尚書代以東都留守王紹復
隸濠泗二州軍喜不敢爲亂愔行未出界卒贈右僕射

鄧景山曹州人天寶中以文吏進爲大理評事遷監察御史至

德初拜青齊節度使徙淮南居職四年政尚簡肅有壘集城門
占曰介物失所余不從革之象揚其有兵乎未幾劉展果反擁
兵二萬自宋州度淮景山逆擊不勝奔于壽州平盧田神功擊
之凡三月平追景山入朝拜尚書左丞俄封南陽郡公充太原
尹北京留守當王思禮後振覈綱紀檢覆隱沒羣小大懼性清
約子弟食惟草具待上賓器止烏漆俛豚魚而已有一裨校
抵死諸將爲諸弟又願代皆不許因請納馬贖罪忽許之衆怒
曰吾屬之命纔直一馬倉復有陳粟紅腐自取食之兼給將士
衆咸怨訕裨將黃抱節因而作亂害之肅宗以爲統馭乖方不
究其罪遣使諭撫隨軍中所請以辛雲京代之死後其家寒窶
所善劉晏屢經紀之嫁其孤女追諡曰敬

杜亞字次公京兆人少頗涉學善言物理及歷代成敗之事至

德初詣靈武條上政事授校書郎辟杜鴻漸河西從事累授大理評事監察御史入朝歷工戶兵吏四員外郎永泰末與楊炎並爲鴻漸副元帥判官還授吏部郎中轉諫議大夫素以才自許見李栖筠風望高合當柄任厚結之俄同訊元載罪遷給事中遣河北宣慰常袞復不悅出爲洪州刺史兼御史中丞江西都團練觀察使德宗立名還揣已必任台輔兼程而進接談引見皆天下大政或以公事諮祈咸納之帝微知不悅入對辭旨疎濶授陝州觀察兼轉運使尋遷河中晉絳防禦使坐劉晏黨復貶刺睦州典元初召拜刑部侍郎再歷揚州長史兼御史大夫淮南節度使至則治漕渠引湖改築防庸夾堤高田因得灌漑又開拓道衢疎啓堙塞公私悅賴然當兵亂後陳少遊哀率頗重民望刻革舊弊冀獲康寧亞乃盛爲奢侈效競渡之戲朝

延聞之以資觀往代改亞檢校吏部尚書判東都尚書省充留
守都防禦使復不躬親部署但委判官張薦楊腆奏取荒地營
田以資軍糧人多艱食大致流散又厚賂中官求兼河南尹帝
漸知虛誕代以董晉召還京師得風疾卒年七十四贈太子少
傅諡曰肅

魏少游邢州鉅鹿人早以吏幹知名天寶末累遷朔方水陸轉
運副使肅宗幸靈武杜鴻漸留少游繕治宮室大爲殿宇幄幕
皆象宮闕諸王公主悉有次舍供饌窮水陸將至整騎卒千餘
奉迎鎧幟鮮明備儀而入帝不悅曰我至此欲就大事安用是
爲命悉去之除左司郎中兩京平封鉅鹿縣侯遷陝州刺史擢
京兆尹以不附李輔國改衛尉卿會率羣臣馬助軍與漢中王
瑒不從帝怒貶渠州長史復爲京尹凡四任緣飾規檢無赫赫

名大曆二年命代李芑爲江西觀察使元載納魚朝恩黨賈明觀之賂免其誅死遣蒞部下效力常回容之俄進刑部尚書改封趙國公卒贈太子太師

路嗣恭字懿範三原人始名劍客以蔭爲鄴尉席豫表爲蕭關令迎徙神烏姑城二縣考績上下爲天下最玄宗謂可嗣魯恭因賜今名轉渭南令主杜化東陽二驛遇關畿用兵使者係道以儲具有素民無騷擾永泰元年授檢校工部尚書兼御史大夫靈州大都督府長史兼知朔方節度留後大將孫守亮驕蹇不受制嗣恭僞稱疾召至卽殺之一軍震驚大曆三年拜刑部尚書知省事俄代魏少游江西觀察使以善治財賦稱初至卽杖殺賈明觀識者多路之政減魏之名會哥舒晃殺節度呂崇賁五嶺大擾詔兼嶺南節度使封冀國公募勇敢士八千任流

人孟瑤督大軍當其衝敬冕率輕兵由間道出冕不意斬之及支黨萬餘築尸爲京觀徧洞魁宿爲惡者皆族滅之私沒船舶商財數百萬代宗惡其專故賞不酬功德宗立陰賊宰相楊炎更錄前功拜兵部尚書東都留守歷懷鄭汝陝河陽三城節度東都畿觀察使卒年七十一贈左僕射 子應字從衆初蔭爲著作佐郎嗣父爵貞元初出爲虔州刺史鑿贛石梗險以通水道故與李泌有恩言應長者思有以報帝卽日加屯田郎中賜金紫累遷宣歙池觀察使封襄陽郡王李錡反發鄉兵救湖常二州不克授左散騎常侍卒諡曰靖 恕字體仁從父討嶺南授工部員外郎得從便宜擢降將伊慎用之賊平以功擢懷州刺史年纔三十楊炎用并魏博爲時嗤詆累遷鄜坊宣歙觀察使坐事貶吉州刺史以右散騎常侍致仕卒贈洪州都督

李承趙州高邑人。祖至遠，吏部侍郎。父禽，國子司業。早卒。承養於兄。曄既長，以悌聞。擢明經。除大理評事。爲河南採訪判官。尹子奇陷汴州，拘送洛陽。覘得賊謀，密啓諸朝。兩京平，例貶臨川尉。不三月，除德清令。擢監察御史。累遷吏部郎中。淮南西道黜陟使。奏置常豐堰於楚州，以禦海潮。溉屯田，凡瘠鹵收常十倍。至今賴其利。德宗信李希烈之奸表，諸先討梁崇義對左右數稱其忠。承言若使役有動勢，後必難制。帝不謂然。事平，希烈果叛。始思其言。擢河中尹。晉絳觀察使廉正有雅望，時稱材幹。未幾改山南東節度使。希烈據襄州，帝慮不受命，欲以禁兵衛送。承辭以單騎入。既至，舍之外館。迫脅萬端，承晏然誓以死守。希烈不能屈，遂大掠去。襄漢蕩然。居一年，輯綏撫安，闔境完復。囚所留守。覘部校使腹心，滅叔雅，密結周會王玢姚愔謀殺希烈。

帝知之。下詔褒美。進檢校工部尚書。湖南觀察使。卒年六十二。贈吏部尚書。

王緯字文卿。太原人。祖景司門員外郎。萊州刺史。父之咸。與叔之賁。之渙。皆善屬文。緯舉明經及書。判入等。歷長安尉。更監察御史。大曆中。與李泌俱爲路嗣恭觀察判官。元載惡泌。嗣恭希意欲殺之。緯護救。獲免。入朝。授全部員外郎。劔南租庸使。檢校司封郎中。彭州刺史。轉檢校右庶子。西川節度營田副使。貞元三年。泌入相。上爲報德。擢給事中。未數日。又遷澗州刺史。兼御史中丞。浙西都團練觀察使。德宗謂黃門要地。可留議事。泌奏。浙西賦入尤劇。精緯清忠。能惠養民。故請遣之。至卽疏蠲韓滉時罰錢未入者十八萬緡。以紓民困。詔從之。加兼御史大夫。諸道使奏裴延齡所進羨餘。皆詣道急用經費。大忤上。

意罷其利權改檢校工部尚書卒年七十一廢朝一日贈太子少保生平性勤儉歷官廉介不肯苟從議者謂傷於苛碎多用削刻之吏督察巡屬人不聊生

李芄字茂初趙州人解褐上邦主簿試大理評事山南東道觀察支使嚴武薦補長安尉兼監察御史李勉署江西觀察判官兼殿中侍御史永泰初劇賊方清陳莊據寧饒間絕江劫掠支黨盤結芄請置州秋浦扼其衿要使不得合勉從其計奏立池州割宣之秋浦青陽饒之至德蒞焉卽以芄行州事署都團練副使檢校虞部員外郎賜金紫母喪解勉又辟永平節度判官檢校工部郎中會李靈耀反兼亳州防禦使護陳頴懷道德宗立授河陽三城鎮遏使檢校太常少卿兼御史中丞練達軍事備禦嚴肅凡糧貨善者先以給士咸得其心未幾轉觀察兼節

度副使諫東畿汜永等五縣時河南北連大兵詔益以神策汝
陝之師進收新鄉共城遂圍衛州進節度使明年與馬燧等破
田悅於洹水納符璽降以功加檢校兵部尚書實封百戶駕幸
奉天詔引軍還興元初進檢校右僕射旱蝗乞免奏除弊之急
莫先德化難以力勝方鎮之臣宜先退讓不可黨權錮祿固請
歸東都卒年六十四廢朝一日贈太子太保

李若初趙郡人曾祖弘節貞觀中并州長史終工部侍郎祖道
謙太府卿若初少孤貧事劉晏任微冗散職判官包信重其勤
幹以女妻之歷陳州太康令與李芑厚獻計請收羨餘錢物交
結權貴芑果遷河陽三城奏爲從事軍中之事多以委之累授
檢校郎中兼御史中丞歷淮甌二州刺史坐公事免歸久之復
起歷衙福越三州充福建都團練浙東觀察使貞元十四年又

代王綽於潤兼御史大夫浙西都團練觀察諸道鹽鐵轉運使長於吏道性剛嚴強力束斂下吏人甚畏服整理鹽法頗有次第時患錢少貨輕州縣禁不出境商賈不通若初始奏縱錢以通物貨詔可明年遇疾卒廢朝一日贈禮部尚書

邵說相州安陽人家世業儒祖貞一號長白山人遇武后革命終身不仕父瓊之玄宗時位殿中侍御史早卒說孤育于母氏登天寶進士遭母喪未調客河洛陷史思明肅宗拜左金吾衛參軍許留思明所爲賊掌兵大小百戰會烏承恩事露不得歸史胡議敗以計得西留郭子儀幕府累長安令祕請少監上言天道三十年一小變六十年一大變思明祿山之亂今將變而爲治願因此時建徽號承天意修享獻歛郊廟褒有德錄賢人與天下更始不報代宗立索所上言與王伾偕名擢伾侍御史

說殷中侍御史在職以才顯德宗擢戶部侍郎乃崇第產附貴
倖希冀入相金吾將軍裴微柳載發其舊事所掠名家子女不
可計得宥死且幸議遂汎以與嚴郢善貶歸州刺史卒

王翊字宏肱晉陽人少通兵術天寶中投衛尉羽林折衝擢才
兼文武科出爲辰州刺史與討康楚元功加秘書少監移朗州
大曆中擢容管經略使自安史亂嶺南兵隸南陽魯炆炆敗衆
奔潰谿洞獫狁相挺爲亂蠻酋梁崇牽僞號平南都統與其黨
覃問誘西原賊張侯夏永攻陷城邑肅據容州前使皆僞治藤
梧劍至卽出私財募士約有功者許署吏人思自奮不數月斬
賊帥歐陽珪移書義藤二州刺史約皆進討自引兵三千與賊
鏖戰遂擒崇牽悉復容州故地捷書聞更置順州以馭餘寇前
後大小百餘戰禽首領七十覃問遁去復遣將李定等分討西

原平鬱林諸州兼御史中丞充招討處置使會哥舒晃復亂
命寔悉師援廣州問因合衆乘間來襲翊設伏生禽之嶺表平
代宗遣使慰勞加金紫光祿大夫賜第京師吐蕃入寇郭子儀
悉河中兵乘邊署爲河中少尹俾領後務悍將凌正約其徒夜
斬關逐旬翊覺之乃陰亂漏劫以誤其期衆驚不敢發翊正伏
誅軍城又安歷汾州刺史振武軍使綬銀等州留後入拜京兆
尹令主涇原兵供餽不稱士心衆怒遂叛翊走奉天拜太子詹
事還京遷大理卿出爲福建觀察使徙東都留守開屯田二十
餘修器械練士卒號令精明遇吳少誠叛獨爲有備關東賴之
卒年七十餘贈右僕射諡曰肅生平雅善虛杞與謀殺崔寧沮
李懷光不朝時議嘗之 子正雅字允謙自少孝行謹飭爲崔
邠所器擢進士累辟使府授監察御史穆宗時爲萬年令抑強

扶弱政甚有聲京尹柳公綽褒其能就賜緋魚俄遷戶部郎中
知臺雜事由太常少卿出爲汝州刺史屬監軍怙權謝病去起
爲大理卿以爭宋中錫獄中外翕然稱之卒贈左散騎常侍

兄翊性謙柔淡於聲利乾元中累官京兆少尹歷商襄二州刺
史山南東道節度使入朝兼御史中丞充北蕃宣慰使代宗素
重之目爲純臣遷刑部侍郎轉御史大夫居憲職不能振舉綱
條以謹厚稱卒贈戶部尚書諡忠惠子重河東令孫衆仲登進
士累官衡州刺史

王鏐字昆吾自稱翊從子能讀左氏春秋冒爲儒者人竊笑之
起家湖南團營裨將團練使曹王臯使招降武岡叛將王國良
以功拜邵州刺史從鎮江西授以兵三千屯潯陽以備李希烈
改刺江州兼御史中丞仍充都虞候鏐小心習事善刺軍中情

偽事無細大悉資以白。舉推心委任。雖家人燕居必使錫。積自
此從鎮。荆南入朝薦於德宗。言文雖不及他。可試驗。擢爲鴻臚
少卿。悉籍天寶以來隴右陷蕃西域朝貢會長名王以下。及安
西北廷校吏不得歸者。無慮四千人。皆皆仰鴻臚禮。資月四萬
緡。凡四十年田業子孫一如編戶。奏皆停給。歲省五十萬緡。帝
嘉其功。提容管經略使。凡八年。谿洞安之。遷廣州刺史兼御史
大夫嶺南節度使。計權厓居市業所入與兩稅等。剗爲時進。餘
悉自入。復較諸蕃舶留子稷京師多載犀珠貨貝。隨權勢高下
以分輕重。逼賂之無不飽。廢名爲刑部尚書。甥子弟亦藉此得
官。適淮南杜佑請代以充節度使。居四年入拜左僕射。歷檢校司
朔悅其心。不數日代爲節度使。居四年入拜左僕射。歷檢校司
徒。徙鎮河中。進兼太子太傅。拜太原尹。至則補完奇費。踰年兵

至五十萬騎五千財用豐餘會同馮弁麾尼師入朝欲示威武
傾駭其人乃悉軍往迎凡列五十里旗幟光鮮戈鋌犀密幽恐
懼入見不敢仰視帝聞嘉之納錢二十萬除檢校司空同中書
門下平章事李絳奏鏐雖有勞僉望不屬恐天下竊議宰相可
市而取帝曰官爵所以待有功鏐當范希朝討鎮無功軍府殘
耗遂成雄富之治有功不賞何以爲勸不聽未幾卒贈太尉諡
曰魏生平善任數持下纖微奸慝必究嘗遇聽理得無名書內
轉中俄取他書焚之示人已滅跡異日輒因小事并訛衆咸以
爲神性復纖嗇不棄竹頭木屑易一敝簾令付船舫替箸燕饗
餘物賣以收利故所積錢視諸將獨多 稷累鴻臚少卿廣治
第宅作複垣洞穴中實金錢鏐卒後二奴告稷更易遺奏隱匿
獻物憲宗留之仗內遣中使檢責其家裴度苦諫恐諸將聞之

各懷危懼方遣付京兆決殺長慶二年遷德州刺史悉賣金寶
賸侍以行為李全略所掠殺而廢其室女惟子叔秦年始五歲
郡人宋忠獻匿之開成中滄州節度劉勣獎忠獻令補軍職送
叔秦京師詔授九品官使奉饗祀

弘簡錄卷四十一終